

МАЯ В 7-Й ДЕНЬ
ПРЕПОДОБНАГО ОТЦА НАШЕГО НИЛА, СОРСКАГО
ЧУДОТВОРЦА

НА МАЛОЙ ВЕЧЕРНЕ

На Господи, возвах: стихиры на 4, глас 4.

Подобен: Дал еси знамение:

Весело днесь сошедшеся в памяти твоей, / Ниле Богомудре, отче наш, / воспети потщимся твоя подвиги, / пощения и бдения и поучение писаний, / имиже напоил еси твою душу, блаженне, / и израстил еси добродетелей многоплодные класы.

Твоих исправлений высоту / и глубину смирения безмерную кто сказати доволен, / преподобне отче Ниле приснопамятне? / Просиял бо еси, яко светило, в Российской земли, / осиявая монашествующих / соборы добродетелей твоих светлостию.

Безмолвия воистинну был еси любитель, / отче приснопамятне, / и пустыни гражданин преизряден, / и, яко древо, насажденное при водах, / еже плод дает во время свое, / точиши бо исцеления с верою призывающим имя твое / и чтущим от любви всесвященные твоя подвиги.

Яко скрижали Богописанныя, / оставил еси чадом твоим, отче, / твоих словес списания, яже на горе Богомыслия / в сердце твоём перстом Божиим написашася, / темже ты почитаем и святое твое совершаем торжество, / славяще ты прославльшаго Иисуса Человеколюбца / и Спаса душ наших.

Слава, глас 6:

Преподобне отче наш Ниле, / воистинну сна твоим очесем не дал еси, / ниже плоти твоей упокоения, / дондеже уготовал еси в себе место Господеви / и селение Богу Иаковлю, / тем во дворы Его, радуйся, вшел еси, / идеже всех веселящихся жилище, / но, отче приснопамятне, / о нас моляся не престай, / твою память всесвященнейшую / верою и любовью благочестно совершающих.

И ныне, праздника или Богородичен:

Владычице Благая, / христиан всех славословие немолчное, / прими, Богородительнице, / хваления раб Твоих, любовь Тя величающих.

На стиховне стихиры, глас 2.

Подобен: ДOME Евфрафов:

Ниле Богомудре, / твоя рабы прими торжествующия любовь, отче, / всесвященную память твою.

Стих: Честна пред Господем смерть преподобных Его.

Верно ныне сошедшеся / в памяти твоей, отче, ублажаем ты любовь, / величающе тебе Прославльшаго.

Стих: Праведник, яко финикс, процветет и, яко кедр, иже в Ливане, умножится.

Приими ныне пение твоих чад, / преподобне, радостно торжествующих в честней твоей памяти, / Ниле Богомудре, отче наш.

Слава, и ныне, глас и подобен тойже:

Приими, Владычице, / моление Твоих раб и Сына Твоего умоли, / с Нилом Богомудрым, подати нам грехов прощение.

Тропарь писан на велицей вечерни. Слава, и ныне, праздника или Богородичен.

НА ВЕЛИЦЕЙ ВЕЧЕРНИ

Блажен муж: 1-й антифон.

На Господи, воззвах: стихиры на 8, глас 6.

Подобен: Все отложше:

Все отложив мирское пристрастие, / преподобне, и крест твой на рамо взем, / чистым и немятежным умом Христу последовал еси: / в пустыни, яко в раи, живой, / Тому угодил еси, яко безплотен, / на земли жительствуя, постом, и молитвою, / и всенощными стоянии страсти умертвил еси, / молчанием же и богомыслием Богу соединился еси, / Егоже моли о душах наших.

Тихое и безмятежное житие пожив, / в месте безмолвнем уединяся, / непрестанною молитвою Богу беседовал еси / и поучением Божественных писаний, / яко дождем благодати, ниву твоего сердца богато напоил еси, Богомудре, / тем и Святаго Духа вместилище показался еси / и плод сторичествуящ принесл еси, / прподобне отче наш Ниле приснопамятне, / молися убо выну ко Господу о душах наших.

Неуклонно шествуя, преподобне, / путем Христовых заповедей, / отеческих Богомудрых преданий опасный хранитель был еси, / Ниле Богомудре, отче наш приснопамятне, / к сим и законоположник и основатель в Российской земли / скитскаго жительства показался еси, / и, яко скрижали завета, твоя богомудрая словеса / и предания твоему житию последовати желающим оставил еси, отче. / Тем молим тя, преподобне, / Христу прилежно молися о душах наших.

Любовию ко Христу уязвлен быв, преподобне, / Того страсти спасительныя непрестанно во уме обносил еси, / постными подвиги плоть распиная со страстьми и похотьми, / острою же власяницею и иным жестокожитием плоти / неудобопокорливое души разумному покорил еси. / Тем молим тя, Боголюбезне отче наш Ниле приснопамятне, / Христу прилежно молися о душах наших.

Слава, глас 8:

Скитскаго жительства наставника тя почитаем, / отче наш Ниле, / твоею бо стезею воистинну право ходити / в безмолвии пустыни познахом: / правый бо путь сего жительства словесы и дела показуя, / яко образ одушевлен, самага себе нам представил еси. / И блажен еси истинно, / яко, сотворив, научил еси, / тем и велий в Царствии Небеснем, / по глаголу Господню, нареклся еси. / Тому убо трудолюбно поработав и вражию всю силу, / козни и ловительства, яко паучину, разтерзав, / победоносец во всех показался еси / и ко Христу венценосец востекл еси, радуяся. / Егоже моли, преподобне, / о всех, верою совершающих твою память всесвященнейшую, / еже дароватися нам грехов прощению и велией милости.

И ныне, праздника или Богородичен:

Царь Небесный за человеколюбие / на земли явися и с человеки поживе, / от Девы бо Чистыя плоть приемый / и из Нея прошедый с восприятием, / Един есть Сын, сугуб естеством, / но не Ипостасию. / Темже, совершенна Того Бога / и совершенна Человека / воистинну проповедающе, / исповедуем Христа Бога нашего: / Егоже моли, Мати Безневестная, / помилуй души наши.

Вход. Прокимен дне и чтения.

Пророчества Исаиина чтение (глава 35):

Радуйся, пустыня жаждающая, да веселится пустыня и да цветет яко крин. И процветет, и возвеселится пустыня Иорданова, и слава Ливанова дадеся ей, и честь Кармилова, и узрят людие Мои славу Господню и высоту Божию. Укрепитеся, руце ослабленные и колена расслабленная, утешитесь, малодушнии умом, укрепитеся, не бойтесь: се Бог наш суд воздаст и воздаст, Той придет и спасет нас. Тогда отверзутся очи слепых и уши глухих услышат. Тогда скочит хромый яко елень и ясен будет язык гугнивых, яко проторжесе вода в пустыни и дбрь в земли жаждущей; и безводная будет во езера и на жаждущей земли источник водный будет, тамо будет веселие птицам и селитва трости и лузи. И тамо будет путь чист и путь свят наречется, и не преидет тамо нечистый, ниже будет тамо путь нечист; разсеянии же пойдут по нему и не заблудят. И не будет тамо льва, ни от зверей злых не взыдет нань, ниже обрящется тамо, но пойдут по нему избавеннии, и собраннии Господем обратятся и приидут в Сион с радостию, и радость вечная над главою их, над главою бо их хвала и веселие, и радость примет я, отбеже болезнь, печаль и воздыхание.

Притчей чтение (главы 10, 3 и 8):

Память праведнаго с похвалами, и благословение Господне на главе его. Блажен человек, иже обрете премудрость, и смертен, иже уведет разум. Лучше бо сию куповати, нежели злата и серебра сокровища. Честнейшая же есть камней многоценных, все же честное недостойно ея есть. Долгота бо дней и лета живота в деснице ея, в шуйце же ея богатство и слава. От уст ея исходит правда, закон же и милость на языке носит. Послушайте убо мене, о чада, честная бо реку, и блажен человек, иже пути моя сохранит: исходи бо мои исходи живота, и уготовляется хотение от Господа. Сего ради молю вас и предлагаю мой глас сыновом человеческим, яко аз, премудрость, устрой совет и разум, и смысл аз призвах. Мой совет и утверждение, мой разум, моя же крепость. Аз мене любящая люблю, ищущии же мене обрящут благодать. Разумейте убо, незлобивии, коварство, ненаказаннии же, прилагайте сердца. Послушайте мене и паки, честная бо реку, и отверзу от устен правая, яко истине поучится гортань мой, мерзки же предо мною устны лживыя. С правдою вси глаголы уст моих: ничтоже в них стропотно, ниже развращенно. Вся права суть разумевающим и проста обретающим разум. Научаю бо вас истине, да будет о Господе надежда ваша, и исполнитесь Духа.

Притчей чтение (главы 10 и 11):

Уста праведнаго каплют премудрость, язык же неправеднаго погибнет. Устне мужей праведных каплют благодати, уста же нечестивых развращаются. Мерила льстивая — мерзость пред Господем, вес же праведный приятен Ему. Идеже аще видет досаждение, тамо и безчестие, уста же смиренных поучаются премудрости. Совершение правых наставит их, и поползновение отрицающихся упасет их. Не пользуют имения в день ярости, правда же избавит от смерти. Умер праведный, остави раскаяние, наручна же бывает и посмеятельна нечестивых пагуба. Правда непорочнаго испраляет пути, в нечестие же падает неправда. Правда мужей правых избавит их, безсоветием же пленяются беззаконнии. Скончавшуся мужу праведну, не погибнет надежда, похвала же нечестивых погибнет. Праведник от лова убежит, в него же место предается нечестивый. Во устех нечестивых сеть гражданином, чувство же праведных благоспешное. Во благих праведных испраится град, и в погибели нечестивых радование. Во благословении правых возвысится град, усты же нечестивых раскопается. Ругается гражданином лишенный разума, муж же мудрый безмолвие водит.

На литии стихира храма и святаго стихиры, самогласны, глас 1:

Во благознаменитый день праздника нашего / вострубим духовною трубою, / духовно радующеся и светло торжествующе, / всевятую и всечестную память отца нашего / и любезно воззовем ему, глаголюще: / радуйся, пастырю и учителю наш / и светило монашествующих пресветлейшее, / отче наш Ниле приснопамятне. / Христу, Емуже усердно поработал еси, отче, / о нас прилежно молися, верою и любовию чтущих тя.

Глас 4:

Священными днесь песньми / священнейшую память отца нашего, / яко цветы, увенчаем, похвальныя венцы плетуше, / и любовию прославляюще того священнейшия подвиги, / и в веселии вопиюще ему: / радуйся, цвете монашествующих краснейший, / во удолиих пустынных прозябший и добрых детелей / совокупленьми страну Белозерскую украсивый. / Радуйся, древо благоплодное, / при исходищах вод псаломски насажденное / и плодами исправлений / и богомудрых писаний твоих / множества иночествующих питающее, / Радуйся, постнических мир алавастр многоценный, / Христову Церковь облагоухавший. / Но, о преблаженне и приснопамятне Ниле, отче наш, / не престай о нас моляся ко Господу, / да избавит нас от всякаго вреда и спасет души наша.

Приидите, празднлюбивых соборы, / приидите, возвеселитесь с нами, / и, лик составльше, торжествуим: / се бо наста всепразднственная / и светононосная память Богоноснаго отца и светлаго міру светильника, / нам же превожделеннейшаго пастыря и учителя, / и ко спасению наставника, / и о всех теплаго предстателя, / молитбося выну ко Господу дароватися всем велией милости.

Слава, глас 6:

Еже по образу Христову соблюл еси невредно, / ум владыку на страсти пагубныя постнически поставив, / и на высоту добродетелей, / яже по подобию Спасову, / яко мощно, возшел еси, / мужески бо естество понудив, / потщался еси хуждшее покорити лучшему / и плоть поработити духу. / Тем и монашествующим наставник явился еси, / житель пустынный, / воистинну благотекущих обучитель / и добродетелей известнейшее правило, / и ныне на Небесех зеркалом разрешшимся, / отче наш Ниле приснопамятне, / чисте зриши Святую Троицу, / моляся присно о всех, верою и любовию чтущих тя.

И ныне, праздника или Богородичен:

Богородице, Ты еси лоза истинная, / возрастившая нам Плод живота, / Тебе молимся: молимся, Владычице, / со святыми апостолы, помиловати души наша.

На стиховне стихиры, глас 6.

Подобен: Ангельския:

Ангельския премірныя силы / твоему житию удивишася, преподобне, / во плоти бо сый, безплотныя враги победил еси / и, постом и молитвами воскриляемь, / вне міра и плоти богомысленно летая, / края желаний достигл еси, / радостно Христу взывая: благословен, / пришедый спасти нас, / Спасе наш, слава Тебе.

Стих: Се удалихся, бегая, и водворихся в пустыни.

Бегая міра, удалился еси / в пустыню псаломски, / и, тамо водворився, Бога, спасающаго тя, / обрел еси, преподобне, / и, обрет, в себе удержал еси: / пришед бо, Христос со Отцем и Духом Святым / обитель в тебе сотвори. / Темже и мы, память твою торжествующе, радостно взываем: / благословен еси, Иже во святых прославляемый, / Спасе наш, слава Тебе.

Стих: Аз к Богу возвах, и Господь услыша мя.

Непрестанно молитвою / и ума трезвостию Богу взывал еси, преподобне, / и Той услыша тя воистинну; / тем и, яко безплотен, на земли пожив, / воздержанием страсти умертвил еси / и глубоким смиренномудрием твоим смирил еси, / яко язвлена, гордаго диавола, / победительно Христу взывая: / благословен, снизшедый и спасый нас, Спасе наш, слава Тебе.

Слава, глас 6.

Самогласен:

Радостно днесь стекшеся, братие, / и духовный лик составльше, / торжествуим светло, и Божественными песньми / летнюю память почтим Богоноснаго отца, / пастыря и учителя нашего, яко цветы, увенчаем похвалами / того священную главу и, всечестную его раку окруживше, / возопием, глаголюще: / радуйся, Ниле благоглаголивый, веселящий / словес твоих теченьми соборы иночествующих. / Радуйся, светильниче монашествующих светозарный. / Радуйся, постническая красото и утверждение. / Прииди и ныне к нам невидимо и благослови чада твоя, / сподобляя ны твоих невестественных даров, / ихже

богато от Христа приял еси, / верно от любви тебе чтущия и прерадостно совершающия / твой всечестный и светоносный праздник. / Избави нас от страстей мучительства и всяких скорбей / и обстояний и обитель твою соблюди невредиму / и всем вся полезная даруй ко Господу твоими молитвами.

И ныне, праздника или Богородичен:

Творец и Избавитель мой, / Пречистая, Христос Господь, / из Твоих ложесн прошед, / в мя оболкийся, первая клятвы Адама свободи. / Темже Ти, Всечистая, яко Божии Матери же и Деве, / воистинну вопием немолчно: / радуйся ангельски, радуйся, Владычице, / предстательство, и покрове, / и спасение душ наших.

На благословении хлебов тропарь святого, дважды и Богородице Дево: единожды.

Тропарь, глас 4:

Удалився, бегая, Давидски, міра, / и вся, яже в нем, яко уметы, вменив, / и, в месте безмолвне вселився, / духовныя радости исполнился еси, отче наш Ниле, / и, единому Богу изволив служити, / процвел еси, яко финикс, / и, яко лоза плодоносна, / умножил еси чада пустыни. / Тем благодарственно вопием: / слава Укрепльшему тя в подвиге пустынножительства; / слава Избравшему тя в России отшельником / уставоположника изрядна; / слава молитвами твоими и нас спасающему.

Ин тропарь, глас 1:

Мірскаго жития отвергся / и мятежа житейскаго бегая, преподобне и Богоносне отче наш Ниле, / не обленился еси собрати цветы райския от писаний отеческих / и, в пустыню вселився, процвел еси, яко крин сельный, / отонюду же прешел еси и в Небесныя обители; / научи и нас, честно почитающих тя, / твоим царским путем шествовати / и молися о душах наших.

На Утрени

На Бог Господь: тропарь святого, дважды.

Слава, и ныне, праздника или Богородичен.

По 1-м стихословии седален, глас 1:

Усердно днесь стекшеся, братие, / духовный лик составим в честней памяти отца нашего, / песни и блгохваления тому плетуще, / благоговейно почтим духовныя его подвиги, / победы и борения, / имиже победы многокозненного врага / и яко победоносец / венчаяся светло от Христа Бога / и Спаса душ наших.

Слава, и ныне, праздника или Богородичен, глас тойже:

Хвалу принесем, вернии, / Матери Бога нашего / и, рабски любовию вземшеся, / воззовем согласно, / ангельски вопиюще к Ней: / радуйся, Благодатная Дево, / Рождшая Спасение душ наших.

По 2-м стихословии седален, глас 3:

Светлое торжество совершающе днесь, / братие, воспоим Христа Избавителя нашего, / хвалу Тому приносяще и взывающе: / возвеличил еси, Христе, Твоего угодника, / показав нам того чудес источник, / источает бо от святого своего гроба / исцелений струи верно притекающим / и любовию чтущим того и Тебе, / Спасе, славящим, славящия Тя прославляющаго.

Слава, и ныне, праздника или Богородичен, глас тойже:

Ходатайства прими / преподобнаго отца нашего Нила / и молитву сотвори, / Чистая, за нас к Богу.

По полиелеи седален, глас 4

Подобен: Удивися Иосиф:

Удивил еси, Владыко Христе, / показав нам во отце нашем такового светильника: / той бо, яко солнце, лучи чудес испущая, / осиявает верных собрания / и просвещает соборы монашествующих / светлостию жительства. / Тем тому любезно воззовем: / Богоносне и всеблаженне отче наш Ниле, / моли Христа Бога грехов оставление даровати / празднующим любовию всечестную память твою.

Слава, и ныне, праздника или Богородичен, глас тойже:

Удивишася, Чистая, / вси Ангелов чини и человеческая множества / таинству Твоего рождения странному: / како бо Неискусомужная Млекопитательница еси / и держиши на руку Твоею / Питающаго всю тварь и Содержащаго. / Темже вопием Ти: / Богородице Приснодево, / моли Сына Твоего грехов оставление даровати / верою поклоняющимся Пресвятому Рождеству Твоему.

Степенна, глас 4. Антифон 1-й, ихже стихи повторяюще поем:

От юности моя / мнози борют мя страсти, / но Сам мя заступи, / и спаси Спасе мой.

Ненавидящий Сиона, / посрамится от Господа, / яко трава бо огнем / будете изсохше.

Слава и ныне: / Святым Духом / всяка душа живится, / и чистотою возвышается, / светлеется Троическим Единством священнотайне.

Прокимен, глас 4

Прокимен: Честна пред Господем смерть * преподобных Его.

Стих: Что воздам Господеву о всех, яже воздаде ми?

Евангелие от Матфея, зачало 43. [Мф. 11, 27–30.]

Рече Господь: Вся **Мне** предана съть отцем **Мои**: и никтоже знает **Сына**, токмо Отец: ни ѡтца кто знает, токмо **Сын**, и емуже аще волит **Сын** открыти. Приидите ко **Мне** вси труждающиса и обремененнии, и аз упокою вы: Возмите иго **Мое** на себе и научитесь от **Мене**, яко кроток есмь и смирен сердцем: и обратите покой дшам вашим: Иго бо **Мое** благо, и бремя **Мое** легко есть.

По 50-м псалме стихира, писана на стиховне Славник.

Радостно днесь стекшеся, братие, / и духовный лик составльше, / торжествуем светло, и Божественными песньми / летнюю память почтим Богоносного отца, / пастыря и учителя нашего, яко цветы, увенчаем похвалами / того священную главу и, всечестную его раку окруживше, / возопием, глаголюще: / радуйся, Ниле благоглаголивый, веселящий / словес твоих теченьми соборы иночествующих. / Радуйся, светильниче монашествующих светозарный. / Радуйся, постническая красото и утверждение. / Прииди и ныне к нам невидимо и благослови чада твоя, / сподобляя ны твоих невестественных даров, / ихже богато от Христа приял еси, / верно от любви тебе чтущия и прерадостно совершающия / твой всечестный и светоносный праздник. / Избави нас от страстей мучительства и всяких скорбей / и обстояний и обитель твою соблюди невредимую / и всем вся полезная даруй ко Господу твоими молитвами.

Каноны праздника или Пресвятыя Богородицы, глас 8: Воду прошел: со ирмосом на 6, и святого на 8, глас 4.

Песнь 1

Ирмос: Отверзу уста моя, / и наполнятся Духа, / и слово отрыгну Царице Матери, / и явлюся, светло торжествуя, / и воспою, радуясь, Тоя чудеса.

Греховною тьмою покрываемь, не могу ясно зрети к высоте исправлений твоих, отче, но ты, яко сострадатель и милостив, помози ми, возсиявая спасительный в души моей свет, да пою, радуясь, светлая твоя исправления и преславная чудеса.

Мысленный рай показался еси, отче, произражая различных добродетелей цветы, плоды красны своему Владыце принесл еси, украсившему тя чудеса.

Едину преступив заповедь, первозданный из рая изгнан бысть; ты же, преподобне, заповедей Владычных соблюдением наследник сего показался еси, древа животного наслаждаясь присно и, в веселии чистаго сердца твоего зря Господа, Божественнаго света Его причащаешься.

Неуклонно шествуя по стопам заповедей, жезл силы, Крест Христов в руках держа, в пристанище безстрастия достигл еси, отче, тем и благодать приял еси целити недуги человеков и преславная творити чудеса.

Богородичен: Ныне время помощи Твоея, Владычице, призри милостивно на озлобление Твоего раба, Чистая, подающи утешение мне, яко да и аз воспою, радуясь, Божественная Твоя чудеса.

Катавасия по уставу.

Песнь 3

Ирмос: Твоя песнословцы, Богородице, / живой и независимый источниче, / лик себе совокупльшия, духовно утверди, / в Божественной Твоей славе / венцев славы сподоби.

Не горяся, дерзнух песнь приносить твоей священной памяти, отче, но любовию твоею движим, Боголюбезне, прими убо сию от твоего раба и ко Господу ходатайствы твоими спасения сподоби мя.

Любовию тя чтущия, отче, спасай от бед и обстояний, в честней твоей памяти лик себе совокупльшия, и колеблемыя ны страстей бурей утверди твоими мольбами и во пристанище спасения достигнути сподоби.

Кто изречет твоя подвиги, отче, и смирения твоего высоту кто скажет? Воистинну Христов ученик был еси, о Боголюбезне, и снаследник Того Царствия. Поминай убо чад твоих, отче, моляся Христу, да и нас части спасаемых сподобит.

Неключим аз есмь и всячески непотребен и недоумею по достоянию воспети твоя, яже к Богу, исправления, но, отче благосерде, любовь и веру прими и твоими священными ходатайствы спасения мя сподоби.

Богородичен: Недоумет воистинну всяк язык человеческий достойно славословити Тя, о Владычице, по достоянию; аз же, невежеством и грехи многими одержим, что имам принести Тебе, Благая? обаче любовь и веру Твоего раба прими и спасения сподоби мя.

Ин кондак, глас 3:

Терпя, потерпел еси суетныя обычаи / и мирския нравы братий твоих, / обрел еси пустынное безмолвие, / преподобне отче, / идеже постом, бдением и непрестанною молитвою / в трудех подвизався, / ученьми твоими правыя стези указал еси нам / шествовати ко Господу. / Темже и почитаем тя, / всеблаженне Ниле.

Седален, глас 8:

От деяния на высоту / Божественного востекл еси, отче, / видения и, молчание конечное облобызав, / безмятежным умом Богу присно беседовал еси, / сего ради разумении Божественными / отгуду обогатился еси, блаженне, / и был еси пастырь и наставник последующим / равноангельному житию твоему. / Тем, Богоносе отче наш Ниле, / моли Христа Бога грехов оставление / даровати празднующим любовию святую память твою.

Слава, и ныне, праздника или Богородичен:

В пучину люте впав уныния / от множества грехопадений моих, Чистая, / приидох в недоумение и отчаянием ныне одержуся. / Владычице Богородице, Ты мя спаси, / Ты ми помози, грешным бо Ты еси очищение, / яко да и аз, со всеми, получившими Тобою спасение, / веселяся, воспую непостижимое таинство Рождества Твоего / и безмерную Твою милость.

Песнь 4

Ирмос: Седяй в славе / на Престоле Божества / во облаце легце, / прииде Иисус Пребожественный / Нетленную Дланию и спасе зовущия: / слава, Христе, силе Твоей.

Низвергл еси вся вражия, отче, ополчения, стоя бодренно на стражи внимания и издалеча предзря сих коварныя сети, молитвою же и постом безбедно прелетая, победительно пел еси: слава, Христе, силе Твоей.

Всегда во уме имея страдания Спаса нашего и вольное на Кресте распятие, сраспялся еси Тому умерщвлением плоти, преподобне, и, Того Божественною любовию уязвив твое сердце, Боголюбезне, показался еси умиления источник, слезоточа присно и поя: слава, Христе, благоутробному снизхождению Твоему.

Христовою уязвлен любовию, слезныя токи непрестанно из очес изливал еси, Ниле, отче наш приснопамятне, и в пустыни, яко в раи, водворяяся, непрестанныя приносил еси молитвы, поя присно: слава, Христе, силе Твоей.

Увы, коликим нечувствием содержим есмь, окаянный аз: ни смерти боюся, ни страшного судща трепещу, всякому злу повинен сый. Но, о душе всестрастная, поне отныне воспряни в покаянии, Христу зовущи: Твоего ради угодника Нила, пощади мя, Спасе, и исправи стопы моя, Владыко, всемогущею силою Твоею.

Богородичен: Богородице Дево, христиан всех всенадежное Упование, спаси мя, отчаяннаго, о Мати Милосердная, оживи душею умершаго, Жизнь всех Рождшая; Живоносный Источниче, напой мя умиления водами, зноем страстей люте опаляемаго, да, покаяния слезами прохладдемь, благодарно воззову: слава, Владычице, всемогущей силе Твоей.

Песнь 5

Ирмос: Ужасошася всяческая / о Божественной славе Твоей: / Ты бо, Неискусобрачная Дево, / имела еси во утробе над всеми Бога / и родила еси Безлетного Сына, / всем воспевающим Тя / мир подавающая.

Отцев древних Святыя Горы житию подражая, Богоносе отче наш, Ниле приснопамятне, во отишие пустынного безмолвия потекл еси, радуясь, и, тамо во смирении плоды принося Духа, по премногу благоугодил еси славою чудес тя Обогадившему.

Господни заповеди исполняя, кроток и незлобив, отче, был еси, смирен и прост, и во всех добродетелех благоискусен, тем и Святаго Духа орган явился еси, премудре, научая и вразумляя чада твоя достойно ходити во след Христу, во смирении Тому служащим, спасение подающего.

Ныне, преподобне, приемля на Небесех почести трудов твоих, не забуди нас, твой праздник радостно празднующих, но испроси грехов разрешение, молящи Христа, прославльших Его славящим, спасение подающего.

Облеклся еси во Христа, Богомудре, безстрастия одеждою украсився, сострадателен и милостив, отче, был еси согрешающим, смиренномудро поучая и возбуждая к покаянию и ко Христу приводя, всем, во смирении просящим, спасение подающему.

Богородичен: Одеждою студа облекохся окаянный аз, совлечен боготканья, юже во Крещении приях, одежды, о Дево Всенепорочная! Но молю Тя, Всемиловитая, во одежду мя спасения паки облеку, да достоин буду брака Агнца, Емуже от чистых кровей Твоих багряницу плоти исткала еси, всем, воспевающим Тя, спасение подающему.

Песнь 6

Ирмос: Божественное сие и всечестное / совершающе празднество, / Богомудрии, Богоматере, / приидите, руками воспещим, / от Нея рождаемого Бога славим.

С лики святых в Небесных ныне водворяся селениих, о Ниле Богоносе, и со дерзновением предстоя Пресвятей Троице, нас, твоих чад, не забуди, отче, но испроси грехов разрешение твой праздник радостно празднующим, да благодарно тя прославльшаго Бога славим.

Новый благодетельный в Российской земли источник явился еси, Богоносе, струи исцелений изливая от святаго твоего гроба верою несумненною притекающим к тебе, Ниле, отче наш, мы же, веселия исполняеми, тя прославляющего Бога славим.

Усердно от юности твоя даже до честнаго преставления совестью чистою Христу послужил еси, преподобне, Того храня Божественныя заповеди, нестяжанием бо и нищетою себе оградив, на камени терпения твоя стопы, мудре, утвердил еси, Ниле, отче наш.

Многая твоя, о, отче, исправления и яже в Бозе труды и подвиги твоя, пощение и бдение, долу легания и злострадания, нищету и совершенное нестяжание кто изрещи возможет? Воистинну бо истинен монах показался еси, Боголюбезне, тем и мы, любезно твою память чтуще, тя укрепльшаго Бога славим.

Богородичен: Утроба Твоя, о Дево Пренепорочная, пространнейшая небес показася, вместившая Невместимаго Бога. О, преславных вещей! О, непостижимаго Ангелом и человеком, на Тебе совершившагося таинства! Тем Тя, Богородицу, воистинну исповедающе, от Тебе рождшагося Бога славим.

Кондак, глас 8.

Подобен: Взбранной Воеводе:

Любве ради Христовы удалився мирских смущений, / радостною душею вселился еси в пустыни, / в нейже подвизався добре, яко Ангел на земли, отче Ниле, пожил еси: / бдением бо и постом тело свое изнурил еси вечныя ради жизни. / Еяже ныне сподобився, во свете неизреченныя радости Пресвятей Троице / со святыми предстоя, моли, молимтися, припадающе, чада твоя, / сохранитися нам от всякаго навета и злых / обстояний видимых и невидимых враг и спастися душам нашим.

Икос: Ангельскому поревновав житию и великим во отцех подобяся, всего себе отрешил еси мирскаго сплетения, к подвигам же постничества мужески вооружився, опасно путем Божиих заповедей шествовал еси, блаженне. Темже и мы, верно чтущии твою священную память, похвалами ублажаем тя сими: радуйся, ангельскаго жития подражателю; радуйся, древних великих отец житию преемниче. Радуйся, невидимых врагов мужественный победителю; радуйся, заповедей Божиих хранителю усердный. Радуйся, отеческих Богодухновенных преданий опасный ревнителю; радуйся, монашескаго постническаго жительства законоположителю. Радуйся, добродетелей чистейшее зеркало; радуйся, Духа Святаго сладкогласный орган. Радуйся, образе глубокаго смирения; радуйся, ревностный исполнитель Божественных делей. Радуйся, яко тобою научихомся непрелестным путем жития ходити; радуйся, яко твоим за ны ходатайством спасение получитьи надеемся. Радуйся, Ниле чудотворче, отче наш.

Песнь 7

Ирмос: Не послужиша твари Богомудрии / паче Создавшаго, / но, огненное прещение мужески поправше, / радовахуся, поюще: / препетый отцев Господь и Бог, благословен еси.

Песнь препросту усердно приношу ти, отче: прими убо сию от недостойнаго и не возгнушайся мене, паче всех грешншаго, о преблаженне, но, милостивно преклонься, спасение улучшить твоим предстательством сподоби, да, радуяся, пою: препетый отцев Господи и Боже, благословен еси.

Един с Единым Богом непрестанно беседовал еси, отче, чистыя молитвы чистым и немятежным умом Тому принося и совестью чистою, о Богомудре, от деяния бо к видению востек, весь боговиден содеялся еси, блаженне, присно поя: препетый отцев Господи и Боже, благословен еси.

Плодоносен сад показался еси, отче, приносящ плоды духа, любве бо и радости преисполнен был еси, мира, долготерпения, кротости и воздержания, и, яко Христов воистинну, плоть распиная со страстьми и похотьми, и присно поя: препетый отцев Господи и Боже, благословен еси.

Не мудростию, но любовью тебе поющего приими, о, отче, и, светосиянную твоєю молитвою забвения и неведения тьму разгнав, помози ми вопити присно: препетый отцев Господи и Боже, благословен еси.

Богородичен: Под кров Твой, Владычице, прибегающего не отрини, но, яко Всемилостивая, спаси убогаго раба Твоего, от безмерных согрешений моих избавляющи мя, да, радуясь, пою: Препетаго отцев Господа и Бога Мати, во веки благословенна еси.

Песнь 8

Ирмос: Отроки благочестивыя в пещи / Рождество Богородичо спасло есть, / тогда убо образуемое, / ныне же действуемое, / вселенную всю воздвизает пети Тебе: / Господа пойте, дела, / и превозносите Его во вся веки.

Отче наш Ниле приснопамятне, красно и добро воистинну житие препроводил еси, о Боголюбезне: мирския бо молвы избежав и в пустыню уединився, скорби постныя сеял еси со слезами, но ныне, радуясь, жнеши присноживотия класы.

Единому тайная ведущему Богу втайне поработал еси, отче, во смирении проходя добродетелей поприще, о блаженне, по преставлении же твоём явлен и светел еси чудесы, пети воздвизая верныя: Господа пойте, дела, и превозносите Его во вся веки.

Божественною благодатию, сущою в тебе, источаеши исцеления и прогоняеши духи лукавствия от приходящих к тебе верно, Ниле всеблаженне. Тем и мы любезно чтим твою всесвященную память, весело поюще: Господа пойте, дела, и превозносите Его во вся веки.

Богородичен: Услыши, Владычице, болезненное вздыхание Твоего раба, разрешивши вериги моих согрешений, печаль на радость предложи и болезни премени вскоре, да, радуясь, пою Тя, Дево, и превозношу, Чистая, во вся веки.

Песнь 9

Ирмос: Всяк земнородный / да възграется, Духом просвещаемь, / да торжествует же Безплотных умов естество, / почитающее священное торжество Богоматере, / и да вопиет: / радуйся, Всеблаженная / Богородице, Чистая Приснодево.

Пресветел светильник отечеству твоему явился еси, преподобне, осиявая светлостию твоею жительства наша и чудес сияньми, имиже по преставлении твоём прославился еси, о блаженне. Тем, твою светоносную память чтуще, Христа славим, светло ты прославляющаго.

Егда краснии твои нозе, добре по спасения пути текшия, на одре смертном простерл еси, блаженне, тогда ученицы твои, слезы точаще, глаголаху: камо отходиши, пастырю наш, и кому оставляеши чада твоя, отче, ихже духовне породив, воспитал еси млекою твоего мудраго наставления?

Плачем моя радости не растворяйте, о чада, ты рекл еси им, о Богоблаженне, аз бо, веселяся, отхожу прияти венец правды, егоже обеща Христос Того любящим, идеже и вы потщитесь постигнути, соблюдше Того, вкупе и моя заповеди.

Да восплачет вкупе с нами пустыня сия, о отче, аще бо и процвете, яко крин, красующися богоугодным жительством твоим, но не имея по тебе добраго делателя, терние и волчец иматъ возрастити. Обаче не остави посещати стадо твое, отче, и сам ты упаси тебе величающия.

Не забуди и ныне нас, обитающих на месте твоего трудоположнаго жительства, о Ниле Богоносе, отче наш, и песнь усердно тебе приносящим ходатайствуй спасение: тя бо, о всеблаженне, молитвенника и предстателя ко Господу стяжавше, надежды да не отщетимся, верно ты чтущии.

Богородичен: Одеждою спасения одей мя, о всенадежное спасения моего Упование, Мати Божия, на Тебе надеюся, Всемиловитая: сокровищница бо еси милости и вся спасаеши, к Тебе прибегающия. Спаси убо и мене, отчаяннаго, да благодарно пою: радуйся, Всеблаженная Богородице, Чистая Приснодево.

Светилен:

Подвиги твоими о Блаженне, удивил еси Ангелы и человеки, Бога же возвеселил еси, тем ты чтим верно, твою торжествующе память, Ниле Богоносе, отче наш.

Слава, и ныне, праздника, или Богородичен:

Величия Твоя, о Дево и Богородице Чистая, превосходят всякое человек разумение, обаче дерзаем, бранныи, любезно Тебе вопити: радуйся, Ангелом и человеком превожделенная Радосте.

На хвалитех стихиры на 4, глас 8.

Подобен: О, преславнаго чудесе:

О, преславнаго чудесе! / В последних родех просия светило монашествующих, / Нил, премудрый отец наш, / златоструйныя бо реки учений излия / и одушевлен образ себе самага показа / истинно монашествовати желающим, / егоже молитвами, Христе, / спаси души наша, яко Един Благоутробен.

О, преславнаго чудесе! / Божественныя благодати исполнен, / явися Нил, блаженнейший отец наш; / ум бо к Богу вперив, / весь световиден показася, / телом же в пустыни живой, / духом на Небесех обиташе. / Егоже молитвами, / Христе, спаси души наша, яко Един Благоутробен.

О, преславнаго чудесе! / Источник чудесем показася Нил, преподобный отец наш, / ибо и по смерти источает / исцеления верно притекающим к нему. / Егоже молитвами, Христе, / страсти душ и телес наших исцели / и спаси нас, яко един Благоутробен.

Преподобне отче наш Ниле, / воистинну ты, бегая мира и водворяяся в пустыни, / яко агнец незлобив, в ней упаслся еси / на злаце Божественных писаний / и, яко пчела трудолюбна и премудра, / духовныя цветы облетая, / паче меда сладчайшия собрал еси словеса, / имиже питаеши чада твоя, отче. / Темже, днесь сошедшеся, ублажаем тя любовию, / торжествуяще священную твою память / и молящися тобою получитьи грехов оставление / и велию милость душам нашим.

Слава, глас тойже.

Самогласен:

Духовный лик днесь совокупльше, / божественне возвеселимся в священной памяти отца нашего: / се бо предлагает нам трапезу таинственную и питье сладчайшее, / своих постнических подвигов высокая исправления, / всякий разум удивляющия и душевныя наша чувства услаждающия, / имиже духовне насыщени, / хвалу усты недостойными тому принести потщимся. / Сей бо, лоза Христова винограда быв истинно, / страхом суда и болезнями постническими точило сердца своего изгнетая, / слезныя токи, яко вино, / воистинну сердце веселящее, непрестанно точаше. / Тому днесь, духовне веселящися, / хвалу принесем, псаломски воспевающе и глаголюще: / честна пред Господем твоя смерть бысть, преподобне, / и прерадостна нам твоя память, Боголюбезне, / в нейже ныне духовне учреждаеми, / молебно тебе вопием: / молися, Богоносе отче наш Ниле, ко Спасу всех, / даровати нам единомыслие, мир и велию милость.

И ныне, праздника или Богородичен:

Владычице, прими молитвы раб Твоих / и избави нас / от всякия нужды и печали.

Славословие великое и прочее по уставу.

НА ЛИТУРГИИ

**Блаженны, праздника и святого, песнь 6-я, или единого святого,
песни 3-я и 6-я.**

1. **Не** горяся, дерзнух песнь приносити твоей священной памяти, отче, но любовь твою движим, Боголюбезне, прими убо сию от твоего раба и ко Господу ходатайствы твоими спасения сподоби мя.
2. **Любовию** ты чтущия, отче, спасай от бед и обстояний, в честней твоей памяти лик себе совокупльшия, и колеблемыя ны страстей бурю утверди твоими мольбами и во пристанище спасения достигнути сподоби.
3. **Кто** изречет твои подвиги, отче, и смирения твоего высоту кто скажет? Воистинну Христов ученик был еси, о Боголюбезне, и наследник Того Царствия. Поминай убо чад твоих, отче, моляся Христу, да и нас части спасаемых сподобит.
4. **Не**ключим аз есмь и всячески непотребен и недоумею по достоянию воспети твоя, яже к Богу, исправления, но, отче благосерде, любовь и веру прими и твоими священными ходатайствы спасения мя сподоби.
5. **С** лики святых в Небесных ныне водворяя селениях, о Ниле Богоносе, и со дерзновением предстоя Пресвятей Троице, нас, твоих чад, не забуди, отче, но испроси грехов разрешение твой праздник радостно празднующим, да благодарно ты прославльшаго Бога славим.
6. **Новый** благотечный в Российской земли источник явился еси, Богоносе, струи исцелений изливая от святого твоего гроба верою несумненною притекающим к тебе, Ниле, отче наш, мы же, веселия исполняем, ты прославляющаго Бога славим.
7. **Усердно** от юности твоя даже до честнаго преставления совестью чистою Христу послужил еси, преподобне, Того храня Божественныя заповеди, нестяжанием бо и нищетою себе оградив, на камени терпения твоя стопы, мудре, утвердил еси, Ниле, отче наш.
8. **Многая** твоя, о, отче, исправления и яже в Бозе труды и подвиги твоя, пощение и бдение, долу легания и злострадания, нищету и совершенное нестяжание кто изрещи возможет? Воистинну бо истинен монах показался еси, Боголюбезне, тем и мы, любезно твою память чтуще, ты укрепльшаго Бога славим.

тропарь, глас 1:

Мирскаго жития отвергся / и мятежа житейскаго бегая, преподобне и Богоносе отче наш Ниле, / не обленился еси собрати цветы райския от писаний отеческих / и, в пустыню вселився, процвел еси, яко крин сельный, / отнюду же прешел еси и в Небесныя обители; / научи и нас, честно почитающих тя, / твоим царским путем шествовати / и молися о душах наших.

Кондак, глас 8.

Любве ради Христовы удалився мірских смущений, / радостною душею вселился еси в пустыни, / в нейже подвизався добре, яко Ангел на земли, отче Ниле, пожил еси: / бдением бо и постом тело свое изнурил еси вечныя ради жизни. / Еяже ныне сподобився, во свете неизреченныя радости Пресвятей Троице / со святыми предстоя, моли, молимтися, припадающе, чада твоя, / сохранитися нам от всякаго навета и злых / обстояний видимых и невидимых враг и спастися душам нашим.

Прокимен, глас 7:

Прокимен: Честна пред Господем смерть * преподобных Его.

Стих: Что воздам Господеву о всех, яже воздаде ми?

Апостол к Галатам, зачало 213. [Гал. 5, 22 – 6, 2.]

Братие, плод дѣховный есть любви, радость, мир, долготерпение, благость, милосердие, вера, кротость, воздержание: на таковыхъ несть закона. **д** иже **Х**ристовы съть, плоть распаша со страстьми и похотьми. **д**ще живемъ дѣхомъ, дѣхомъ и да ходимъ. **н**е бываемъ тщеславни, дрѣг дрѣга раздражающе, дрѣг дрѣгѣ завидяще. **Б**ратие, аще и впадетъ человекъ в некое прегрешение, вы дѣховнии исправляйте таковаго дѣхомъ кротости: блюдыте себе, да не и ты искѣшенъ бѣдѣши. **д**рѣг дрѣга тяготы носите, и тако исполните законъ **Х**ристовъ.

Аллилуиа: Блажен муж бояйся Господа:

Евангелие Луки, зачало 24. [Лк. 6, 17–23.]

Во время оно, ста **И**исусъ на месте равне: и народъ ученикъ **Е**го, и множество много людей отъ всѣхъ **И**удей и **И**ерѣсалима и поморна **Т**ирска и **С**идонска, иже придоша послушати **Е**го и исцелитиса отъ недѣгъ своихъ, и страждѣщии отъ дѣхъ нечистыхъ: и исцѣлахѣсѣ. **И** весь народъ искаше прикасатиса **Е**му: яко сила отъ **Н**его исхождаше и исцѣлаше всѣ. **И** **Т**ой возведъ **О**чи **С**вои на ученики **С**воѣ, глаголаше: **Б**лажени нищии дѣхомъ: яко ваше есть **Ц**арствіе **Б**ожіе. **Б**лажени, алчѣщии ныне: яко насытитесѣ. **Б**лажени, плачѣщии ныне: яко возсмейтесѣ. **Б**лажени бѣдетѣ, егда возненавидѣтъ васъ человецы, и егда раздѣчатъ вы, и поносѣтъ, и пронесѣтъ имѣ ваше яко зло, **С**ына **Ч**еловеческаго ради. **В**озрадѣйтесѣ в той день и възиграйте: се бо мзда ваша многа на небеси.

Причастен: **В** память вечную будетъ праведникъ:

Молитва

О преподобне и Богоблаженне отче Ниле, Богомудрый наставниче и учителю наш! Ты, любве ради Божия удаляясь мірских смущений, в непроходней пустыни

и в дебрех изволил еси вселитися, и, яко лоза плодоносна, умножив чада пустыни, явил еси себе им словом, писанием и житием образ всякия иноческа добродетели, и, яко Ангел во плоти, пожив на земли, ныне в селениих Небесных, идеже празднующих глас непрестанный, водворяешися, и, с лики святых Богу предстоя. Тому хвалы и славословия непрестанно приносиши. Молим тя, Богоблаженне, настави и нас, жительствующих под кровом твоим, непреткновенно ходити по стопам твоим: любити Господа Бога всем сердцем своим, Того Единого возжелети и о Нем Едином помышляти, мужественно же и благоискусно пратися с долу влекущими нас помыслы и прилоги вражиими и тех всегда побеждати; возлюбити всякую тесноту монашескаго жития, и возненавидети красная мѣра сего любве ради Христовы и насадити в сердцах своих всякую добродетель, в нейже сам потрудился еси. Моли Христа Бога, да и всем православным христаном, в мире живущим, просветит ум и очи сердечная, еже ко спасению, утвердит их в вере, и благочестии, и в делании заповедей Своих, сохранит от лести мѣра сего и дарует им и нам оставление грехов и к сим приложит, по неложному обетованию Своему, и вся потребная нам ко временному животу. Да, в пустыни и в мѣре жительствующе, тихое и безмолвное житие поживем во всяком благочестии и чистоте и Того усты и сердцем прославим купно со Безначальным Его Отцем и Пресвятым и Благим и Животворящим Его Духом всегда, ныне, и присно, и во веки веков. **А**минь.